

ღირსეულ მეტოქეთა მატჩი

თბილისი. ვ. ი. ლენინის სახელობის “დინამოს” სტადიონი. 27 ივლისი.

“დინამო” (თბილისი) – “არარატი” (ერევანი) 1:1 (0:0).

“დინამო”: იმნაძე, ანდლულაძე, ჩივაძე, ხიზანიშვილი, მუჯირი, დარასელია, სვანაძე, სულაქველიძე, ჟვანია (თავაძე), ცავა (გუცაევი), შენგელია.

“არარატი”: ვასილიევი, პოლსიანი, ქეროფიანი, აშ. ხაჩატრიანი, რაფ. გალუსტიანი, კირაკოსიანი, პ. გალუსტიანი, ოჰანესიანი, ყასაბოლიანი (ან. ხაჩატრიანი), მელიქიანი (სარქისიანი), როზ. გალუსტიანი.

მსაჯი: ვ. კუხნეცოვი (ომსკი).

გააფრთხილეს ხიზანიშვილი, ოჰანესიანი, ქეროფიანი.

ბოლო 4 ტურში თბილისის დინამოელებს თავიანთ მინდორზე ზედიზედ ჰქონდათ დამაბული შეხვედრები ძალზე ძნელ, პრინციპულ მეტოქეებთან. ყველამ იცის, რომ ბოლო წლებში ძალიან გვიჭირს თამაში ბაქოელებთან, ეს შეხვედრა კი მოვიგეთ ანგარიშით 5:3. შემდეგ ანგარიშით 1:0 დავამარცხეთ მოსკოვის “დინამო”, 3:1 – მოსკოვის “სპარტაკი” და 6 შესამდობიდან 6 აღებული ქულის შემდეგ საჭირო იყო მონაპოვარის განმტკიცება ჩემპიონატის ერთ-ერთ ლიდერთან – ერევნის “არარატთან”.

ბოლო 6 ტურია ერევნელმა ფეხბურთელებმა არ იციან რა არის მარცხი. მათ წარმატებით ითამაშეს შინაც და სტუმრადაც, მათაც “მოცილეს” თავიდან ისეთი ძნელი მეტოქეები, როგორებიცაა მოსკოვის “დინამო” და “სპარტაკი” და 27 ივლისისთვის გათამაშების ცხრილში მეორე ადგილი ეკავათ მინსკის “დინამოს” შემდეგ.

მართალია, დინამოელები ოდნავ ჩამორჩებოდნენ უშუალო ლიდერთა ჯგუფს, მაგრამ მათი სატურნირო პერსპექტივა “არარატზე” უკეთესია, ვინაიდან, როგორც იცით, გუნდს გამოტოვებული აქვს რამდენიმე კალენდარული მატჩი. ყველაფერი ეს გვპირდებოდა უშეღავათო, დამაბულ ბრძოლას.

მართლაც, თამაში ისეთი იყო, როგორც კარგა ხანია არ გვინახავს ჩვენს სტადიონზე და როცა მატჩი დამთავრდა, მაყურებლებმა ტაშით გააცილეს ფეხბურთელები, ამასთან კარგი თამაშისთვის სათანადო მიუზღეს სტუმართა კოლექტივს, რომელმაც ფრიად სასიამოვნო შთაბეჭდილება დატოვა.

არ შეგვცდებით თუ ვიტყვით, რომ ერევნელთა გუნდი ახლა ძალიან ძლიერია და, შეიძლება ითქვას, არაფრით ჩამოუვარდება 1973 წლის იმ “არარატს”, რომელმაც მაშინ დუბლი გააკეთა, ე.ი. ერთდროულად მოიპოვა სსრ კავშირის ჩემპიონობაც და თასიც. გუნდის წამყვანი მოთამაშის ოჰანესიანის გარშემო შემოკრებილია პერსპექტიული, ენერგიული კოლექტივი. თბილისელი მაყურებელი კარგად ერკვევა საფეხბურთო აკვარეში და საკუთრივ დარწმუნდა, რომ ერევნელებს ახლა ჩინებული გუნდი ჰყავთ. ალბათ, ამიტომ გულდაწყვეტილი არავინ დარჩენილა, რომ დინამოელებმა ზედიზედ მოგებული 3 მატჩის შემდეგ ქულა “გაატანეს” მეტოქეებს. ეს ქულა სტუმრებმა დაიმსახურეს აზრიანი, მაღალტექნიკური, მებრძოლი ფეხბურთისთვის.

“დინამომ” საგრძნობი უპირატესობით დაიწყო თამაში, დაახლოებით 20–25 წუთი უტევდა სწრაფად, ტემპიანად, შემართებით, მაგრამ სტუმართა დაცვას თითქმის ბზარაც არ ჰქონდა, რომ ამ იერიშებს შედეგი მოჰყოლოდა. ერევნელები მეთოდურად, გეგმაზომიერად მოქმედებდნენ მთელს მინდორზე, მათ თანდათან შეანელეს დინამოელთა ტემპი, გაათანაბრეს თამაში და შემდეგ ასევე მეთოდურად გადავიდნენ კონტრიერიშზე. ტონის მიმცემი, რა თქმა უნდა, ოჰანესიანი იყო, მას კარგად უბამდნენ მხარს პარტნიორები და ტაიმის დასასრულს ინიციატივა უკვე “არარატს” ჰქონდა.

ეს ტაქტიკურად რთული, უკომპრომისო თამაში შესვენების მერეც გაგრძელდა და როცა 52–ე წუთზე პ. გალუსტიანის მიერ წამოწყებული კომბინაციის შემდეგ ოჰანესიანმა ისარგებლა “დინამოს” მცველთა შეცდომით და გახსნა ანგარიში, ცხადი გახდა, რომ თბილისელებს ძალთა მაქსიმალური მობილიზება დასჭირდებოდათ მდგომარეობის გამოსასწორებლად.

მართალია, ერევნელები კვლავინდებური თავგამოდებით იბრძოდნენ, მაგრამ მასპინძლები სულ უფრო მძლავრად, ხანგრძლივად უტევდნენ, ფორვარდებს დიდ დახმარებას უწევდნენ ნახევარმცველები, რომლებიც ხშირად თვითვე გადადიოდნენ სტუმართა კარის შტურმზე. სახიფათოდ უტევდნენ სულაქველიძე, დარასელია, სვანაძე, მათს რიგებს რეგულარულად უერთდებოდნენ ჩივაძე, მუჯირი, და 68–ე წუთზე სულაქველიძემ კარგად ისარგებლა მეკარე ვასილიევის შეცდომით: ფლანგური მიწოდების დროს ვასილიემა წინდაუხედავად დატოვა კარი, წინ გამოვიდა, სულაქველიძემ კი თავით გაგზავნა ბურთი კარის შორეულ კუთხეში – 1:1.

ამის შემდეგ დინამოელებმა კიდევ უფრო მეტი მონდომებით შეუტიეს მეტოქეს, “არარატის” მცველებს, რომლებსაც აქტიურად ეხმარებოდნენ წინა ხაზების მოთამაშეებიც, მძიმე დატვირთვა

დააწვავთ, თუმცა, საკმარისი იყო ბურთის მოგერიება და სტუმრები მაშინვე იწყებდნენ საპასუხო იერიშებს, ორ–სამჯერ “დინამოს” კარი აშკარა ხიფათის წინაშე აღმოჩნდა.

ერთი სიტყვით, თბილისის “დინამოს”, რომელიც ჩვენი აზრით, საუკეთესო ფორმაშია, ამ დღეს საქმე ჰქონდა მეტად ძლიერ, მონოლითურ კოლექტივთან და მაყურებელმაც მეტად შინაარსიანი, დამაბული თამაში, ღირსეულ მეტოქეთა საინტერესო ბრძოლა ნახა.

ბ. ქორქია.

“ლელო”, 29 ივლისი, 1982 წ.